

法華經安樂行義

陳南嶽思大禪師說

土十

法華經者大乘頓覺無師自悟疾成佛道一切世間難信法門凡是一切新學菩薩欲求大乘超過一切諸菩薩疾成佛道須持戒忍辱精進勤修禪定專心勤學法華三昧觀一切衆生皆如佛想合掌禮拜如敬世尊亦觀一切衆生皆如大菩薩善知識想勇猛精進求佛道者如藥王菩薩難行苦行於過去日月淨明德佛法中名爲一切衆生喜見菩薩

聞法華經精進求佛於一生中得佛神通亦如過去妙莊嚴王捨國王位以付其弟王及群臣夫人太子內外眷屬於雲雷音王佛法中出家誦法華經專求佛道過八萬四千歲一生具足諸佛神通受記作佛爾時人民壽命大長八萬九千歲土十與今閻浮提八十年四百日等於三天下八十四年等今時人壽命短促惡世劫濁苦逼惱多是故於此求道易得觀一切衆生皆如佛想者如常不輕菩薩品中說勤修禪定者如安樂行品初說何以

故一切衆生具足法身藏與佛一無異如佛
藏經中說三十二相八十種好湛然清淨衆
生但以亂心惑障六情暗濁法身不現如鏡
塵垢面像不現是故行人勤修禪定淨惑障
垢法身顯現是故經言法師父母所生清淨

常眼耳鼻舌身意亦復如是若坐禪時不見
諸法常與無常如安樂行中說菩薩觀一切
法無有常住亦無起滅是名智者所親近處
欲求無上道 修學法華經 身心證甘露
清淨妙法門 持戒行忍辱 修習諸禪定

得諸佛三昧	六根性清淨	菩薩學法華
具足二種行	一者無相行	二者有相行
無相四安樂	甚深妙禪定	觀察六情根
諸法本來淨	衆生性無垢	無本亦無淨
不修對治行	自然超衆聖	無師自然覺
不由次第行	解與諸佛同	妙覺湛然性
上妙六神通	清淨安樂行	不游二乘路
行大乘八正	菩薩大慈悲	具足一乘行
甚深如來藏	畢竟無衰老	足名摩訶衍
如來八正道	衆生無五欲	亦非斷煩惱

妙法蓮華經 是大摩訶衍 眾生如教行
 自然成佛道 云何名一乘 謂一切眾生
 皆以如來藏 畢竟恒安樂 亦如師子吼
 涅槃中間佛 世尊實性義 為一為非一
 佛答師子吼 亦一亦非一 非一非非一
 云何名為一 謂一切眾生 皆是一乘故
 云何名非一 非是數法故 云何非非一
 數與及非數 皆不可得故 是名眾生義
 問曰云何名為妙法蓮華經云何復名一乘
 義云何復名如來藏云何名為摩訶衍云何

復名大摩訶衍如大品經說摩訶言大衍者
 名乘亦名到彼岸云何更有大摩訶衍云何
 復名眾生義答曰妙者眾生妙故法者即是
 眾生法蓮華者是借喻語譬如世間水陸之
 華各有狂華虛誑不實實者甚少若是蓮華
 即不如此一切蓮華皆無狂華有華即有實
 餘華結實顯露易知蓮華結實隱顯難見狂
 華者喻諸外道餘華結果顯露易知者即是
 二乘亦是鈍根菩薩次第道行優劣差別斷
 煩惱集亦名顯露易知法華菩薩即不如此

不作次第行亦不斷煩惱若證法華經畢竟成佛道若修法華行不行二乘路問曰餘華一華成一果蓮華一華成衆果一華一果者豈非一乘一華成衆果者豈非次第答曰諸水陸華一華成一果者甚少墮落不成者甚多狂華無果可說一華成一果者發聲聞心即有聲聞果發緣覺心有緣覺果不得名菩薩佛果復次鈍根菩薩修對治行次第入道登初一地是時不得名爲法雲地地地別修證非一時是故不名一華成衆果法華菩薩

即不如此一心一學衆果普備一時具足非次第入亦如蓮華一華成衆果一時具足是一乘衆生之義是故涅槃經言或有菩薩善知從一地至一地思益經言或有菩薩從一地至一地從一地至一地者是二乘聲聞及鈍根菩薩方便道中次第修學不從一地至一地者是利根菩薩正直捨方便不修次第行若證法華三昧衆果悉具足問曰云何名衆生妙云何復名衆生法耶答曰衆生妙者一切人身六種相妙六自在王性清淨

故六種相者即是六根有人求道受持法華
讀誦修行觀法性空知十八界無所有性得
深禪定具足四種妙安樂行得六神通父母
所生清淨常眼得此眼時善知一切諸佛境
界亦知一切衆生業緣色心果報生死出沒
上下好醜一念悉知於眼通中具足十力十
八不共三明八解一切神通悉在眼通一時
具足此豈非是衆生眼妙衆生眼妙即佛眼
也云何名種種有二一名凡種二名聖種凡
種者不能覺了因眼見色生貪愛心愛者即

是無明爲愛造業名之爲行隨業受報天人
諸趣遍行六道故稱行也相續不絕名之爲
種是名凡種聖種者因善知識善能覺了眼
見色時作是思惟今見色者誰能見耶眼根
見耶眼識見耶空明見耶爲色自見意識對
耶若意識對盲應見色若色自見亦復如是
若空明見空明無心亦無覺觸不能見色若
眼識能見識無自體假托衆緣衆緣性空無
有合散一一諦觀求眼不得亦無眼名字若
眼能見青盲之人亦應見色何以故根不壞

故如是觀時無眼無色亦無見者復無不見
男女等身本從一念無明不了妄念心生此
妄念之心猶如虛空身如夢如影如燄如化
亦如空華求不可得無斷無常眼對色時則
無貪愛何以故虛空不能貪愛虛空不斷無
明不生於明是時煩惱即是菩提無明緣行
即是涅槃乃至老死亦復如是法若無生即
無老死不著諸法故稱聖種凡種聖種無一
無二明與無明亦復如是故名爲眼種相妙
耳鼻舌身意亦復如是六自在王性清淨者

一者眼王因眼見色生貪愛心愛者即是無
明一切煩惱皆屬貪愛是愛無明無能制者
自在如王性清淨者如上觀眼義中說用金
剛慧覺了愛心即是無無明無老死是金剛
慧其力最大名爲首楞嚴定譬如健將能伏
怨敵能令四方世界清淨是金剛智慧亦復
如是能觀貪愛無明諸行即是菩提涅槃聖
行無明貪愛即是菩提金剛智慧眼自在王
性本常淨無能汙者是故佛言父母所生清
淨常眼耳鼻舌身意亦復如是是故般若經

說六自在王性清淨故龍樹菩薩言當知人身六種相妙人身者即是衆生身衆生身即是如來身衆生之身同一法身不變易故是故華嚴經歡喜地中言其性從本來寂然無生滅從本已來空永無諸煩惱覺了諸法爾超勝成佛道凡夫之人若能覺此諸陰實法如涅槃中迦葉問佛所言字者其義云何佛告迦葉有十四音名爲字義所言字者名爲菩提常故不流若不流者即是無盡夫無盡者即是如來金剛之身問曰云何名常故不

流答曰眼常故名爲不流云何名常無生故常問曰云何無生答曰眼不生故何以故眼見色時及觀眼原求眼不得即無情識亦無有色眼界空故即無斷常亦非中道眼界即是諸佛法界覺知此眼無始無來處亦無無始猶若虛空非三世攝如般若經中曇無竭菩薩語薩陀波菴言善男子空法不來不去空法即是佛無生法無來無去無生法即是佛無滅法無來無去無滅法即是佛是故當知眼界空故空者即是常眼空常故眼即是

土十

六

佛眼無貪愛愛者即是流流者即是生眼無貪愛即無流動若無流動即無有生眼不生故無來無去無生即是佛眼既無生即無有滅滅者名爲盡眼既無滅當知無盡眼既非盡無來無去亦無住處眼無盡即是佛菩薩以是金剛智慧知諸法如無生無盡眼等諸法如即是佛故名如來金剛之身覺諸法如故名爲如來非獨金色身如來也得如實智故稱如來得眼色如實智耳聲鼻舌味身觸意法如實智故名如來金剛之身如法相

解如法相說如言無生來言無滅佛如是來更不復去乘如實道故名如來問曰佛何經中說眼等諸法如名爲如來答曰大強精進經中佛問鶻崛摩羅云何名一學鶻崛答佛一學者名一乘乘者名爲能度之義亦名運載鶻崛摩羅十種答佛一答有二種足二十^七答今且略說以鶻崛摩羅第五答中乃至第六答以此二處四種答中總說眼等如來義云何名爲五所謂彼五根此則聲聞乘非是如來義云何如來義所謂彼眼根於諸如來

常決定分明見具足無減修所謂彼耳根於諸如來常決定分明聞具足無減修所謂彼鼻根於諸如來常決定分明嗅具足無減修所謂彼舌根於諸如來常決定分明嘗具足無減修所謂彼身根於諸如來常決定分明觸具足無減修所謂彼意根於諸如來常決定分明識具足無減修云何名為六所謂六入處是則聲聞乘非是如來義所謂眼入處於諸如來常明見來入門具足無減修所謂耳入處於諸如來常明聞來入門具足無減

修所謂鼻入處於諸如來常明嗅來入門具足無減修所謂舌入處於諸如來常明嘗來入門具足無減修所謂身入處於諸如來常明觸來入門具足無減修所謂意入處於諸如來常決定分明識淨信來入門具足無減修是故初發心新學諸菩薩應善觀眼原畢竟無生滅耳鼻舌身意其性從本來不斷亦非常寂然無生滅色性無空假不沒亦不出性淨等真如畢竟無生滅聲香味觸法從本已來空非明亦非暗寂然無生滅根塵既空

寂六識即無生三六如如性十八界無名衆生與如來同共一法身清淨妙無比稱妙法華經是故大集中佛告淨聲王汝名曰淨聲當淨汝自界自界眼界空即持戒清淨眼界空寂故即佛土清淨耳鼻舌身意性畢竟空寂是名諸如來修習淨土義問曰云何名爲安樂行云何復名四安樂云何復名二種行一者無相行二者有相行答曰一切法中心不動故曰安於一切法中無受陰故曰樂自利利他故曰行復次四種安樂行第一名爲

正慧離著安樂行第二名爲無輕讚毀安樂行亦名轉諸聲聞令得佛智安樂行第三名爲無惱平等安樂行亦名敬善知識安樂行第四名爲慈悲接引安樂行亦名夢中具足成就神通智慧佛道涅槃安樂行復次二種行者何故名爲無相行無相行者即是安樂行一切諸法中心相寂滅畢竟不生故名爲無相行也常在一切深妙禪定行住坐卧飲食語言一切威儀心常定故諸餘禪定三界次第從欲界地未到地初禪地二禪地三禪

地四禪地空處地識處無所有處地非有想非無想處地如是次第有十一種地差別不同有法無法二道爲別是阿毗曇雜心聖行安樂行中深妙禪定即不如此何以故不依止欲界不住色無色行如是禪定是菩薩遍行畢竟無心想故名無想行復次有相行此是普賢勸發品中誦法華經散心精進如是等人不修禪定不入三昧若坐若立若行一心專念法華文字精進不卧如救頭然是名文字有相行此行者不顧身命若行成就即

見普賢金剛色身乘六牙象王住其人前以金剛杵擬行者眼障道罪滅眼根清淨得見釋迦及見七佛復見十方三世諸佛至心懺悔在諸佛前五體投地起合掌立得三種陀羅尼門一者總持陀羅尼肉眼天眼菩薩道慧二者百千萬億旋陀羅尼具足菩薩道種慧法眼清淨三者法音方便陀羅尼具足菩薩一切種慧佛眼清淨是時即得具足一切三世佛法或一生修行得具足或二生得極大遲者三生即得若顧身命貪四事供養不

能勤修經劫不得是故名爲有相也問曰云何名爲一切法中心不動故曰安一切法中無受陰故曰樂自利利他曰行答曰一切法者所謂三毒四大五陰十二入十八界十二因緣是名一切法也菩薩於是一切法中

三忍慧一者名爲衆生忍二者名法性忍三者名法界海神通忍衆生忍慧名爲生忍法性忍者名爲法忍法界海神通忍者名爲大忍前二種忍名破無明煩惱忍亦名聖行忍聖人行處故名聖行凡夫能行即入聖位是

爲聖行大忍者具足五通及第六通具足四如意足面對十方諸佛及諸天王面對共語一念能覺一切凡聖故名大忍於諸神通心不動聖道具足名爲聖忍三忍者即是正慧離著安樂行問曰云何名爲生忍復名衆生忍云何名不動忍復名之爲安答曰生忍名爲因衆生忍者名之爲果因者衆生因果者衆生果因者是無明果者是身行正慧觀於因破無明斷一切煩惱一切法畢竟無和合亦無聚集相亦不見離散是菩薩知集聖諦

土十

十

微妙慧是名生忍若無和合不動不流即無
有生衆生忍者名爲身行諸受受爲苦受有
三苦受樂受不苦不樂受何以故被打罵時
觀苦受打爲身苦罵爲心苦飲食衣服細滑
供養名爲身樂及諸摩觸亦名身樂稱揚讚
歎名爲心樂卒得好布施眼見未受及其受
已亦名心樂觀此無明受及與苦樂受苦時
起忍辱慈悲不生嗔心受樂時觀離受心不
貪著受不苦不樂時遠離捨心不生無明一
切諸受畢竟空寂無生滅故此三受皆從一

念妄心生菩薩觀此供養打罵讚歎毀訾與
者受者如夢如化誰打誰罵誰受誰喜誰恚
與者受者皆是妄念觀此妄念畢竟無心無
我無人男女色像怨親中人頭等六分如虛
空影無所得故是名不動如隨自意三昧中
說菩薩自於十八界中心無生滅亦教衆生
無生滅始從生死終至菩提一切法性畢竟
不動所謂眼性色性識性耳鼻舌身意性乃
至聲香味觸法性耳識因緣生諸受性鼻舌
身意識因緣生諸受性無自無他畢竟空故

是名不動自覺覺他故名曰安自斷三受不生畢竟空寂無三受故諸受畢竟不生是名爲樂一切法中心無行處亦教衆生一切法中心無所行修禪不息并持法華故名爲行如鶖崛摩羅眼根入義中說亦如涅槃中佛性如來藏中說安樂行義者衆多非一今更略說一切凡夫陰界入中無明貪愛起受念著絕罪苦行不能自安生死不絕是故無樂名爲苦行一切二乘諸聲聞人陰界入中能對治觀不淨觀法能斷貪婬慈心觀法能斷

瞋恚因緣觀法能斷愚癡別名字說名爲四念處是四念有三十七種差別名字名爲道品觀身不淨及能了知此不淨身是無明根本空無生處不淨觀法能破身見男女憎愛及中間人皆歸空寂是名破煩惱魔觀十八界三受法外苦受陰內苦受陰知是苦受陰身心所行受念著處一切皆苦捨之不著內樂受外樂受內外樂受觀此樂受心貪著故能作苦因捨之不受知樂受一切皆空苦樂二觀能破世諦心住真諦初捨苦樂便得不

苦不樂以貪著故復是無明復更觀此不苦
不樂受無所依止無常變壞何以故因捨苦
樂得不苦樂苦樂二觀既無生處亦無滅處
畢竟空寂不苦不樂從何處生如是觀時空
無所得亦無可捨既無可捨亦復不得無可
捨法若無世諦則無真諦真假俱寂是時即
破陰入界魔觀心無常生滅不住觀察是心
本從何生如此觀時都不見心亦無生滅非
斷非常不住中道如此觀已即無死魔法念
處中觀一切法若善法若不善法若無記法

土十

十二

皆如虛空不可選擇於諸法中畢竟心不動
亦無住相得不動三昧即無天子魔因捨三
受得此解脫名為苦樂行因果俱名為聲聞
非菩薩道鈍根菩薩亦因此觀無取捨為異
何以故色心三受畢竟不生無十八界故無
有內外受取既無受即無可捨觀行雖同無
三受間故巧慧方便能具足故是名安樂行
安樂行中觀則不如此正直捨方便但說無
上道文殊師利菩薩白佛言世尊是諸菩薩
於後惡世云何能說是經佛告文殊師利若

菩薩摩訶薩於後惡世欲說是經當安住四
法一者安住菩薩行處及親近處能為衆生
演說是經云何名為菩薩行處若菩薩摩訶
薩住忍辱地柔和善順而不卒暴心亦不驚
又復於法無所行而觀諸法如實相亦不行
不分別是名菩薩摩訶薩行處云何名為住
忍辱地略說有三種忍一者衆生忍二者法
忍三者大忍亦名神通忍衆生忍者有三種
意第一意者菩薩受他打罵輕辱毀訾是時
應忍而不還報應作是觀由我有身今來打

罵譬如因的然後箭中我若無身誰來打者
我今當勤修習空觀空觀若成無有人能打
殺我者若被罵時正念思惟而此罵聲隨聞
隨滅前後不俱審諦觀察亦無生滅如空中
響誰罵誰受音聲不來入耳耳不往取聲如
此觀已都無瞋喜二種意者菩薩於一切衆
生都無打罵恒與軟語將護彼意欲引導之
於打罵事心定不亂是名衆生忍衆生若見
菩薩忍即發菩提心為衆生故故名衆生忍
第三意者於剛強惡衆生處為調伏令改心

故或與麤言毀訾罵辱令彼慚愧得發善心
名衆生忍云何名辱不能忍者即名爲辱更
無別法問曰打罵不瞋慈悲軟語可名爲忍
剛惡衆生處菩薩是時不能忍耐狀似嗔想
打拍罵辱摧伏惡人令彼受苦云何復得名
爲忍辱答曰打罵不報此是世俗戒中外威
儀忍及觀內空音聲等空身心空寂不起怨
憎此是新學菩薩息世譏嫌修戒定智方便
忍辱非大菩薩也何以故諸菩薩但觀衆生
有利益處即便調伏爲護大乘護正法故不

必一切慈悲軟語涅槃中說譬如往昔仙豫
國王護方等經殺五百婆羅門令其命終入
阿鼻地獄發菩提心此豈非是大慈大悲即
是大忍涅槃復說有德國王護覺德法師并
護正法故殺一國中破戒惡人令覺德法師
得行正法王命終後即生東方阿閼佛前作
第一大弟子臣兵衆亦生阿閼佛前作第二
第三弟子諸破戒黑白惡人命終皆墮阿鼻
地獄於地獄中自識本罪作是念言我爲惱
害覺德法師國王殺我即各生念發菩提心

土十

十四

從地獄出還生覺德及有德國王所爲作弟子求無上道此菩薩大方便忍非小菩薩之所能爲云何而言非是忍辱覺德法師者迦葉佛是有德國王釋迦佛是護法菩薩亦應如此云何不名大忍辱也若有菩薩行世俗忍不治惡人令其長惡敗壞正法此菩薩即是惡魔非菩薩也亦復不得名聲聞也何以故求世俗忍不能護法外雖似忍純行魔業菩薩若修大慈大悲具足忍辱建立大乘及護衆生不得專執世俗忍也何以故若有菩

薩將護惡人不能治罰令其長惡惱亂善人敗壞正法此人實非外現詐似常作是言我行忍辱其人命終與諸惡人俱墮地獄是故不得名爲忍辱云何復名住忍辱地菩薩忍辱能生一切佛道功德譬如大地生長一切世間萬物忍辱亦復如是菩薩修行大忍辱十五法或時修行慈悲軟語打罵不報或復行惡口麤言打拍衆生乃至盡命此二種忍皆爲護正法調衆生故非是初學之所能爲名具足忍法忍者有三種意第一意者自修聖行

觀一切法皆悉空寂無生無滅亦無斷常所謂一切法觀眼根空耳鼻舌身意根空眼色空聲香味觸法皆空觀眼識空耳鼻舌身意識空無我無人無衆生無造無作無受者善惡之報如空華諸大陰界入皆空三十六八無名號無初無後無中間其性本來常寂然於一切法心不動是名菩薩修法忍第二意者菩薩法忍悉具足亦以此法教衆生觀上中下根差別方便轉令住大乘聲聞緣覺至菩薩三種觀行合同一色心聖行無差別二

乘凡聖從本來同一法身即是佛第三意者菩薩摩訶薩以自在智觀衆生方便同事調伏之或現持戒行細行或現破戒無威儀爲本誓願滿足故現六道身調衆生是名菩薩行法忍方便具足化衆生大忍者名神通忍云何名爲神通忍菩薩本初發心時誓度十方一切衆生勤修六度法施戒忍辱精進禪定三乘道品一切智慧得證涅槃深入實際上不見諸佛下不見衆生即作是念我本誓度一切衆生今都不見一切衆生將不違我

往昔誓願作是念時十方一切現在諸佛即
現色身同聲讚歎此菩薩言善哉善哉大善
男子念本誓願莫捨衆生我等諸佛初學道
時發大誓願廣度衆生勤心學道既證涅槃
深入實際不見衆生憶本誓願即生悔心顧
念衆生是時即見十方諸佛同聲讚歎我亦
如汝念本誓願莫捨衆生十方諸佛說是語
時菩薩是時聞諸佛語心大歡喜即得大神
通虛空中坐盡見十方一切諸佛具足一切
諸佛智慧一念盡知十方佛心亦知一切衆

土十

十六

生心數一念悉能遍觀察之一時欲度一切
衆生心廣大故名爲大忍具足諸佛大人法
故名曰大忍爲度衆生色身智慧對機差別
一念心中現一切身一時說法一音能作無
量音聲無量衆生一時成道是名神通忍柔
和善順者一者自柔伏其心二者柔伏衆生
和者修六和敬持戒修禪智及證解脫法乃
至調衆生瞋恚及忍辱持戒及毀禁皆同涅槃
相所謂六和者意和身和口和戒和利和
及見和善順者善知衆生根性隨順調伏是

名同事六神通攝柔和者名為法忍善順者
名為大忍而不卒暴者學佛法時不忽忽卒
暴取證外行威儀及化衆生亦復如是心不
驚者驚之曰動卒暴忽忽即是驚動善聲惡
聲乃至霹靂諸惡境界及善色像耳聞眼見
心皆不動解空法故畢竟無心故言不驚又
復於法無所行者於五陰十八界十二因緣
中諸煩惱法畢竟空故無心無處復於禪定
解脫法中無智無心亦無所行而觀諸法如
實相者五陰十八界十二因緣皆是真如實

土十

十七

性無本末無生滅無煩惱無解脫亦不行不
分別者生死涅槃無一無異凡夫及佛無二
法界故不可分別亦不見不二故言不行不
分別不分別相不可得故菩薩住此無名三
昧雖無所住而能發一切神通不假方便是
名菩薩摩訶薩行處初入聖位即與等此是
不動真常法身非是方便緣合法身亦得名
為證如來藏乃至意藏

法華經安樂行義